

1 Tessalonicenses

1 ¹Natyo Paulo, Silas, Timóteo xoaha kakoa naxairaty a exahe babera Xekohaseti koamaniya tyaconiterenai ana wenakalati Tessalônica tyaconiterenae ana. Wexe Enore koamaniya, Xekohaseti Jesus Cristo koamaniya xoaha xisaonita. Kasani waiye, ximehexaiko xisaona naokita.

Tessalônica Yerenae Tyakekone, Nawenane

²Wihalahareta minita Enore kakoa xihiyeta, exahe wotyaxemaita xiso wiraexala kakoa. ³Wotyaxemaita xiso Wexe Enore haotita: aokitere akereta xisomita xityakekone hiyeta. Xiyawaiyetyakakoane hiyeta kalore xahakita enomana, exahe heko xatyahita Wiyekohase Jesus Cristo xahita.

⁴Nohinaeharenai, exahe akiti waiyekehalakita womana: Enore awaitita xiso, exahe aoka terota xiso haomana. ⁵Hiyaiya, Iraiti Waiyexe wiyakaita xihiyeta hoka maisa wiraene kakoa taita xini. Enore niyatere exahe Isekohaliti Waiyexe kahinaetya wiso hoka xityakeko kaiserehare iraiti. Wisaohenere xinekoni xowaka wawenane waiyekehalaka xomana hoka hatyo hiyeta tehitia xityakeko hoka ⁶wisaonitere akereta, exahe Xekohaseti nawenane akereta hoka xisaona. Xityakeko iraiti hoka Isekohaliti Waiyexe aihalahalinikisa xiso, iniyalahare xakore matyakekoneharenai mokahitaha xiso hoka. ⁷Nikare xisaona hoka tyakekohatiyai Macedônia koa, Grécia koa nali tyaconiterenai xisaonitere akereta tyaona aokowiha. ⁸Xihiyeta Macedônia, Grécia xoaha tyaconiterenai sema Xekohaseti tahi, exahe xityakekone Enore tahi exaorekoatyaha tyotya wenakalatinakoa. Hiyeta hoka maisaiya xoare maheta wiraehitita. ⁹Hoka tyotya hatyo wenakalatikoa tyaconiterenai iraetaha wisoa wiyaiyehenere xiso tahi, exahe xakaihakatyahitaha waiye xamohenere wiso akiti, exahe xahalakihenere xawenane enore metalahare koamaniya hoka Enore aliterexe koamaniya xisaohenere tahi akiti. ¹⁰Exahe xakaihakatyahitaha tehitia Jesus, Enore ityani haikoahaneheta xiyatyahane enokoata tahi. Hatyo atyo waini hoka Enore ekasekihetene. Hatyo atyo waiyexe aniya moheta wiso iniyalahare tyohetehenere nonitata.

Paulo Hatene Tessalônica Nali

2 ¹Nohinaeharenai, waiyekehala kita atyo xomana nali wisoa
wiyaiyehenere xiso xowakiyere. Hatyo xowaka Iraiti wiyakaihenere
atyo katyakekotyaka. ²Wimakaokeneharet a xomana Tessalônica nali,
maisa waiye xini wikaxomokaka, exahe wikamokonasetya ka wenakalati
Filipos nali. Aiyateretyoahitaha xakore wiyahita hoka Enore atyo iyateliti
isa womana hoka Iraiti Waiyexe tyoitere enalitare wiyakaita. ³Tyotya
wiyakaiterenae atyo aliterexe taita wiyakaita xihiye, maisa wamaoseraita
xini xiso. Maisa wametakisa maheta xini, maisa waiyalaharetya xawenane
maheta xini. ⁴Tyotya wiraeterenae Enore aokitere akereta taita wiraeta.
Exaokala ximita nikare wisaonita hoka wiyakaita iniraine. Exahe wiso hoka
kasani Enore ihalahare wikakoa waokita, maisa halitinai ihahalare wikakoa
waokare. Hiyaiya, Enore atyo tyotya wiyahekola kakoa waiyoreta.

⁵Hiyaiya, waiyekahalaka xomana wiraehenere: maisa wirahekoata
xini wemaxalotya maheta xiso hoka xityakeko wiraene, exahe maisa
wamaoseraty a xiso hoka olo kaxekaka womana maheta xini. Enore ana
tehitiya hatyoharenae waiyekahalakita. ⁶Maisa xoana xowaka haiyanan
aexakeritya wiso waokare, maisa xiso, exahe haiyaharenae hekoti hoka.
⁷Wiso atyo Cristo niraene kakoarenae hoka kinatyaxaiya wira e xikakoa
waokowita hoka kinatyaiyaiya wira. Xakore hoka xinali wisaonitere
xowaka waiye wamokita xiso, hatya ohiro haisani waiye mokitere akereta.
⁸Kalore wawaiyetita xiso. Kasani maisa iraiti Enore nalitare taita xini
wiyakai xihiye waokowita. Exahiya wikaxaisaka xihiyeta hoka ehekoreya,
wiyawaiyera xiso hiyeta.

⁹Nohinaeharenai, xotehena! Wisaonitere xinekoni xowaka wahakita kalore,
waiyateretyoita. Ferakoa, makiya hoka wahakita winakaira niyahare, maisa
wiyakaihenere Iraiti Waiyexe xihiye xowaka haiyanan waxa waokowiye hoka.
¹⁰Xiso atyo wawenane xihiya, Enore tehitiya hatyoharenae waiya. Waiyexe,
totere, ekaiserehare harenae wisaona xiso tyakekoterenai koni. ¹¹Wisaonitere
xinekoni xowaka waiye wamokita xiso, hatya haliti waiye mokitere haisani
akereta. Hatyo harenae akiti waiyekehala kita xomana. ¹²Waihalalahalinikisa,
wemaxalokisa, waotyakisa harenae xiso hoka Enore aokitere akereta xisaona
hoka ihalahare xikakoa maheta. Hatyo atyo aoka xiso haomana hoka kawisa xiso
xiyanne xisaona ewaikoherakoa hoka waiye kaiserehare xisaona ehaliya maheta.

¹³Hiyeta hoka wihalahareta minita Enore kakoa xihiyeta. Nali xinekoni
wisaonita hoka Enore niraene wiyakai xihiye hoka xasemene hoka xaokene
xomana. Maisa halitinai niraene xaokitene hoka Enore niraene terota xaokene.
Hoka aliterexe atyo Enore niraene. Hiyaiya, Enore atyo xiso tyakekoterenae
koni hakita. ¹⁴Nohinaeharenae, Judéia koa nali tyeoniterenae Jesus Cristo
kaxaikoneharenae Enore koamaniya tyeoniterenae kaxomokakitere akereta
xikaxomokakita. Judeunai matyakekoneharenae iniyalahare mokahiterene

akereta xawenakala tyaoniterenae matyakekoneharenae iniyalahare mokahitaha xiso.¹⁵ Hiyaiya, judeunae atyo aisa Xekohaseti Jesus, exahe iraiti xakaisaseharenae hoka aisaha, hoka iniyalahare mokaha wiso. Hatyohare maisa waiyeta Enore ana. Exahe nikare tyaonaha hoka tyotya haliti nahalakoahare tyaonaha.¹⁶ Kasani maisa Iraiti Waiyexe isekohaliti niyasehareheta tahi wiyakai aokareha majudeuneharenae hiye hoka hatyo hiyeta aeroretyaha minita iniyalahare tyomahitere. Hoka kalikini atyo Enore ehareta ihiyeha hoka kalorite iniyalahare mokahene.

Paulo Haki Waiyehitiya Aokowi Tessalônica Yerenae

¹⁷ Nohinaeharenae, wiyanexonita hakiti hoka kalore wakakawaita xiso, hoka kalore wahekoita xitahi. Exahe waiyateretyoa wiyaiyehitiya xiso maheta.

¹⁸ Kasani wiyaiyehitiya xiso waokowita. Natyo, Paulo hekoti kasani nowaiyeheta xiso naokowita. Xakore hoka Ahalakoahaliti talaita wiso.¹⁹ Xiso terota wihalahare xamokita. Wiyekohase Jesus Cristo haikoahetehenere xowaka ite masakare wihalahare xihiyeta heko xikinatere xisaohenere ekoamaniya hiyeta.²⁰ Aliterexe atyo xiso wiyaokowiharetyoane, wihalaharene xoaha.

3 ¹ Wahehena wimawaiyaneta xiso hoka mahaiya aliyakere watyahahitita hoka wiwawa Atenas nali wisaona hoka² wihinaehare Timóteo waxikaty xomana. Hakita tehitiya wikakoa Enore hatene hoka xakaihakaita Iraiti Waiyexe Cristo tahi hoka waxikatene xomana aihalahalinikisa xiso hoka masakare xityakeko maheta,³ exahe maisa xala hare halakijita hatyakekone iniyalahare xikaxomokakitere hiyeta. Enore xaokalita haiya xowaka nikare wikaxomokakita, hatyoharenae waiyekehalakita xomana.⁴ Xinekoni wisaonitere xowaka wiyakai xihiye: "Iniyalahare ite wikaxomokaka", wexa xihiye hoka nikare wikaxomokaka.

⁵ Hatyo hiyeta Timóteo naxikaty xomana, maisaiya aliyakere natyahahitita xitahi akiti hoka naxikatene xomana xityakekone tahi nasema naokowi hoka. Xoana xamani hoka Tihanare hasakaharetita xiso emaisatya maheta wihatene xinekoni aokowita hoka.

⁶ Hatyaoseta Timóteo haikoaheta wenakalati Tessalônica nalita hoka xakai wihiye xityakekone, xiywaiyetyakakoane tahi xakai wihiye. Xawaiyetitire wiso, kasani xiayieheta wiso xaokowitere, wiso wiyaiyeheta tehitiya xiso waokowitere akereta xakai wihiye.⁷ Hiyeta hoka wihalahare xamoka, wasema xitahi hoka. Howitihare tyaonita wawenane, iniyalahare harenae wikaxomokakita xakore hoka xityakekone wasemita hoka wihalahare xamoka, xityakekone aihalahalinikijita wiso.⁸ Xisoiya atyo Wiyekohase koamaniya xikinatere xisaonita hoka wihalahare kaiserehare wisaona.

⁹ Nikare hoka wihalahareta Enore kakoa xihiyeta. Wihalahare Enore haotita xaihalahalinikijitere wiso hiyeta.¹⁰ Wiraexaita ferakoa, makiya harenae waxita Enore, kasani halakisa wiso hoka wisoa wiyaiyeheta xiso hoka xoalini hare wimaxaotyakiraharene xiso kakoa waotyakisa xiso hoka xityakekone exahexe tyaona maheta.

¹¹Maika Wexe Enore, Wiyekohase Jesus Cristo hoka memere moka waheta maniya hoka wisoa wiayiyehta xiso. ¹²Maika Xekohaseti kahinaetya xiso hoka masakare xawaiyetya kakoita, exahe tehitiya tyotya halitinae xawaiyetya, kalore wawaiyetitere xiso akereta. ¹³Nikare ite aiyatelikisa xiso hoka waiye, iyoma, iniyalahare ximaomanehare wexe Enore nahalakoa xisaona Wiyekohase Jesus Cristo tyohetehenere tyotya haomanerena kakoa xowaka.

Wenati Enore Aokitere Akereta

4 ¹Nohinaeharenæ, kalikini atyo wihiyeta waiyekehalaka xomana wenati waiyexe Enore awaiyetitere. Alitere nikare xisaonita. Hiyeta hoka wirae xihije waotyakisa harenæ xiso, Xekohaseti Jesus niraene kakoare wiso hoka. Maika masakare heko nikare xisaona. ²Xekohaseti Jesus xaokalita waotyakihenere xiso atyo waiyekehalakita xomana.

Awa Atyo Iniyalahare Xisoma Ohiro Kakoa

(*1 Corint. 5.1-5; 6.15-20; Hebreus 13.4*)

³Exakere xisaona aokita Enore: kasani waiye xawenane xamoka ekoamaniya hoka maisa iniyalahare xisoma ohiro kakoa aokare. ⁴Maika waiye xamoka xexanityonæ, xaiminisahene hare Enore aokitere akereta. ⁵Awa atyo Enore koamaniya mawenaneharenæ iniyalahare ahekoitire akereta xisaona. ⁶Nikare hoka maisa xala hare komaniyaita hahinaehare, exahe maxaiminirita hahinaehare. Koxaka wiyakai xihije exe akiti xakore hoka kalikini wiyakaihityene xihije: Enore ite iniyalahare moka hatyohare iniyalahare tyomitereharenæ. ⁷Hiyaiya, Enore haomanere aoka wiso, maisa iniyalahare wisoma maheta xini. Waiyexe taita wisoma maheta. ⁸Xala xamaniya exe xaotyakisati maisa awaiyetita hoka maisaiya haliti xini maxawaiyirita. Isekohaliti Waiyexe Enore ijitere xomanaiya atyo maxawaiyirita.

⁹Xawaiyetita xihinaehare tyakekohatiyene. Enore aotyakisa xiso hoka maisaiya xoare maheta hatyo akiti waxairahitita xomana. ¹⁰Xisonae koxaka xawaiyetita tyotya xihinaeharenæ Macedônia koa tyaoniterenæ. Hoka maika exahexe xawaiyetya kakoa. ¹¹Maika xaiyateretyoa ximehexaikohare xisaona maheta. Maika xawenane takita xikaxaiko hoka waiye xisaona. Xihatene maniya taita xisaona hoka hatyo xihatene hiyeta xisaona. Koxaka hatyo tahi wirae xihije. ¹²Nikareya xisaona hoka matyakekoneharenæ aiminisa xiso, exahe maisaiya xala hare hiye xikahinaetyaka xaokita.

Xekohaseti Tyoaneneheta

(*Atos 1.10-11; 1 Tessal. 5.1-4; 2 Tessal. 1.7-10 Hebreus 10.37; Apocal. 1.7*)

¹³Nohinaeharenæ, kasani waiyekehalaka xomana koxaka wainihenerenæ tahi waokita, maisa xamaikohareta matyakekoneharenæ akereta maheta. Matyakekoneharenæ atyo kalore amaikoharetaha, motyalaite maisa waiyehenahitahene aowitaha hoka. ¹⁴Waiyekehalakita atyo womana Jesus

kamane hoka kaxekasekisakehetehener. Hoka Jesus haikoahetehener xowaka ite tyotya tyakekoterenae wainihenerenae ekasekiheta Enore hoka ehaikoahetahene ekakoa.¹⁵ Xekohaseti aotyakihenere akereta wirae: Xekohaseti haikoahetehener xowaka ite hekotata wiso haiyaharenae wikasetata hoka maisaiya atyo wiyaneta kamatinae nahitita.¹⁶ Xekohaseti haikoahetehener enokoata xowaka ite hoka kinatyaxa kawisa, exahe anjo xekohase kawisa kinatyaxa. Enore konetane ite kaemaharehena hoka hatyaoseta ite Xekohaseti exoaheta enokoata hoka ekasekiheta hotohare Cristo tyakeko hoka wainihenerenae.¹⁷ Hatyaoseta ite wiso kasetaterenae kasehetehenerenae kakoa wahalakoatyakakaoaheta kaiminiti tyaconitere nali wahalakoatyah maheta Xekohaseti enoakiya nali. Nikare ite wisaota mene ekakoa.

¹⁸ Hiyeta hoka xaihalahalinikisa kakoa exe iraiti kakoa.

**Memere Tyaconahitaha Xekohaseti Haikoahaneheta Niyahare
(1 Tessel. 4.13-18; 2 Tessel. 1.7-10; Hebreus 10.37; Apocal. 1.7)**

5 ¹Nohinaeharenae, maisaiya atyo naxairaita, exahe naimenekoita hatyoharenae kaotyakene xomana. ²Koxaka xasema Xekohaseti haikoahaneheta tahi. Hatyoharenae waiyekehalakita xomana. Haikoaheta maxaimenekotyakahareta, kaiwarexe makiya maxatyahakaharetere ijoitere hatyako akereta. ³Halitinae ite hatyo xowakehena hoka nehena: — Waiye wimehexaiko wisaonita — nehenahaite hoka hatyaoseta ite eharehena rotita kamawenekoaretyakaha hoka maisaiya aliyakere tekoahitaha. Hatyo xowakehena ite hoka motya ohiro ityani kaweta hoka maisa aliyakere tekoare akereta ite maisa aliyakere tekoahitaha.

⁴Xakore hoka maisa atyo makaliroti koni xini xisaonita, nohinaeharenae. Hoka Xekohaseti ite haikoahetehena hoka maisaiya atyo eharehena rotita kaotyakihitita xomana kaiwarexe akereta. ⁵Xityotya atyo xaokanatyakalati, ferakoiti anerenae. Maisa atyo makiyere, makaliroti anerenae xini wiso.

⁶Hiyeta hoka maisaiya wisemakitere akereta wisaonita wawenane kakoa haiyaharenae akereta. Maika heko wikaosetere akereta wisaonita hoka waiye wikaxaikoawita. ⁷Hiyaiya, makiya tyotya nemakahitaha, makiya tehitiya hekahitaha. ⁸Hoka wiso atyo ferakoare hoka hatyo hiyeta maika wikaxaikoawi. Hoka tyakekoti, xawaiyetyati xoaha kakoa ite wimemere wisaohena tikolaliti talala akereta watalatya maheta witikolali. Exahe hoka wiyatyahane waiyexe maniya mohetehenere wiso ite seriti talala akereta talatya wiso. ⁹Hiyaiya, Enore atyo haomanere aoka wiso maisa iniyalahare moka maheta xini wiso omati iniyalahare nahalakoa. Wikaiyakeheta maheta atyo Wiyekohase Jesus Cristo hiyeta. ¹⁰Hiyaiya, Cristo atyo waini womana hoka wisaona ehaliya maheta, tyohetehenere xowaka ite wikasetata xamani, xoana koxaka xamani wiwaini. ¹¹Hatyo hiyeta xaihalahalinikisa kakoa, zakahinaetya kakoa kalikini xisaonitere akereta.

Xaotyakisati, Tyawaxati Miyane

¹²Nohinaeharenæ, Xekohaseti axikatya haiyaharenæ xinekoni kahinaetyaha, aotyakisaha maheta xiso. Maika xaiminisa hatyo hakiterenæ xinekoni. ¹³Waiye xamoka hatyo hakiterenæ xinekoni. Xaiminisahene, exahe xawaiyetyahene hatyo ehatehena hiyeta. Maika ximehexaikohare xisaona haiyanae kakoa.

Wenati Waiyexe

(Coloss. 3.12-17; Tito 3.1-2; Tiago 1.19-22; 3.17-18)

¹⁴Xasemehena: Xaotyakisa maxahalitikarenæ xiaytere kakoa. Xaihalahalinikisa amaikohareterenæ. Xakahinaetya inira tyakekoterenai. Maika ximamaxaharenehare xisaona tyotya halitinai kakoa. ¹⁵Maika xirihare hoka maisa xala hare emaisahitita iniyalahare, iniyalahare kakoa. Waiye xamoka kakoa, exahe hoka tyotya halitinai hoka waiye xamoka.

¹⁶Maika xihalahareta mene, ¹⁷exahe xiraexata mene. ¹⁸Maika exahe xoana xamaní xisaonita hoka xihalahareta mene Enore kakoa. Haxawalita atyo xawenane tyaoñita Jesus Cristo kakoa hoka nikare xisaona aokita Enore. ¹⁹Awa atyo xahowitihalikisa Isekohaliti Waiyexe hatene. ²⁰Awa atyo Enore niraene xakaisase xakaihena xihîye hoka xikoexahalisene. ²¹Maika tyotya xoalini hare akiti waiye xahekota hoka waiyexe xema taita xisaona. ²²Hoka tyotya xoalini hare maisa waiyexe hoka awa xaokene.

²³Maika Enore mehexaikohaliti ijitere womana xawenane waiyexe maniya taita moka. Maika xisekohare, xîyawahare, xihâre harenæ waiyexe kaxaiko iniyalahare nonitata Wiyekohase Jesus Cristo haikoahaneheta kijiya. ²⁴Kawihenere xiso ite nikare tyoma, maisaiya maotyaneta xiso.

²⁵Nohinaeharenæ, maika xiraexaita tehitiya womana.

²⁶Xikatyawaxehena wihinaeharenæ Cristo koamaniya tyaoñiterenæ hiye hoka xasohitanakolisahene.

²⁷Enore xaokalita nomita xihîye: Maika exe babera kakaexaretyaka tyotya tyakekohenerenæ ana.

²⁸Maika Wiyekohase Jesus Cristo waiye kaxaikota xiso, eko xoaha.